

Umuna a Domingo Kalpasan Paskua

Maikalima a leksion: Maiwaragawag ti Ministerio ni Jesus

I. Panggep

Kalpasan ti panagadal, ken ti di agsarday a panangipakita dagiti nagannak ken dagiti nataengan, iti pagtuladan a biag, dagiti nagatendar ket manamna a:

1. Mangrugi a maibagada a ti Ina ni Jesus isu ti immuna a maestrana iti pammati;
2. Mangrugi a mailasinda no sino dagiti imuna a mangisuro kadakuada iti pammati;
3. Mangrugi a mangiyebkas iti panagyaman kadagiti mangisursuro iti pammati.

II. Konsepto: Insursuro ni Maria ni Jesus nga agpammati iti Dios.

Dagiti Kasapulan: Biblia, ladawan ni Maria a mangisursuro ken Jesus, naipadakkel a ladawan ni Maria ken Jesus nga agtintinulong, pagkantaan, chart ti laglagipen a bersikulo

III. Linaon ti Panagadal

A. Panglukat a Panagdayaw

1. Panangpasangbay: Kablaawan dagiti ubbing ket kitaen dagiti ubbing nga adda.
2. Isuro ti kanta "Love God" ken uliten dagiti nasursuro a kanta iti napalabas a leksion.
3. Panglukat a Kararag: "Ama, dayawendaka iti daytoy a bigat. Agyamankami ti agnanayon a pannakikaaddam kadakami. Idalannakami kas binsabinsaenmi no kasano ti panangisuro ni Maria ken Jesus maipapan iti panagpammati, agkararagkami iti nagan ni Jesus. Amen!

B. Panagsagana

1. Isagana dagiti ubbing iti panagay-ayam iti "Charade". Isurat dagitoy a balikas iti papel. Agbasbasa, Agug-ugas ti pinggan, Agdengdengeg, Agwalwalis Agkarkararag, Agkankanta, Agpakpakan iti ayup, Agsalsala.
2. Kupinen ida. Ikabil iti kahon. Mangayab ti maysa nga ubing ket mangala iti papel ket aramidenna no aniat' nakasurat iti papel. Dagiti dadduma nga ubbing pugtuanda no ania ti aramididen tikaeskwelaanda.
3. Panagsasarita. Saludsoden dagiti sumaganad:
 - a. Sino ti nangisuro kenka nga agbasa?
 - b. Sino ti nangisuro kenka nga agkararag?
 - c. Sino ti nangisuro kenka nga agkanta?
 - d. Sino ti nangisuro kenka nga agwalis?

C. Panawen ti Panagadal

1. Sawem: "Ti estoriatayo ita, maamuantayo no sino ti nangisuro ken Jesus a mangaramid kadagitoy nga trabaho.
2. Ipakita ti ladawan ket binsabinsaen kasanguanan nga basaen ti istoria. Maysa a malem agtugtugaw ni Maria iti salasda. Sinaludsod ni Maria ken Jesus, "Inugasam kadi dagitay nanganantayon?"
"Wen, nanang!" insungbat ni Jesus.
"Dagitay ngarud kalapatitayo, pinakanmo kadi idan?" dinamag manen ni Maria.
"Wen nanang, pinakankon idan!" insungbat ni Jesus nga umis-isem.

“Nagsayaaten nakkong. Pudno a natulnog ka nga ubing, Jesus,” dinayawna ti anakna. Idi kuan, inayaban ni Maria ni Jesus, “Umayka ditoy abayko annakko. Ikabesa ta manen ti naindaklan a bilin a kas inaramidda itay bigat. Agkidemda ngarud.

Ket kinunada,

“Denggem, O Israel, ti Apo ti Diostayo. Maymaysa ti Diostayo.

Naindaklan ti nagan ken Gloria ti Dios ket ti pagarianna agnanayon ken awan patinggana.”

Intuloy ni Jesus nga inkabesa ti naindaklan a bilin kas sursurotena ni nanang a nangisursuro kenkuana.

D. Panangpauneg ti Adal/Panagbibinnuray

a. Sinno nangisuro ken Jesus nga agkararag? (Maria)

b. Ania ti masansan nga ikabesa da Jesus ken ti Inana? (ti Naindaklan a Bilin)

2. Alaen ti uppat a ladawan iti activity sheet. Diskutiren no kasano ni Jesus a nagubing. (uppat a ladawan ti adda iti activity sheet)

3. Panagbibingay. Dutokan dagiti ubbing nga diskutiren no ania ti ibagbaga ti ladawan nga ar-aramiden ni Jesus babaen kadagiti ladawan.

E. Panangdiskubre ti Adal

Saludsodem: “Sinno ti immuna a nangisuro ken Jesus? (Ti inana, ni Maria) Sinno nangisuro kenkuana nga agkararag, agkanta ken kadagiti istoria maipapan iti Dios? (Nagannak, Maestra ti Sunday School). Ania pay dagiti insursuroda kadakayo maipapan iti panagayat ti Dios? Sawem: Nagtultuloy a dimmakel ni Jesus iti panagpammati gapu iti panangidalan ni Maria kenkuana. Ni Maria ti imuna a nangisuro kenkuana. Dumakkeltayo babaen iti panagayat ti Dios kas agtultuloy nga isuro ken idalandatayo dagiti nagannaktayo. Ti mangisursuro kadatayo ti Sunday School ken ti pastortayo tulongandatayo a dumakel iti panagpammati.

F. Panangyaplikar ti Naadal

1. Isuro ti Laglagipen nga Bersikulo.

Para N/K: “Ti pusok idaydayawna ti Apo.” (Lukas 1:46)

Para YE: “Toy pusok idaydayawna ti Apo, ket agragsak toy kararuak gapu iti Dios a Mangisalakian kaniak.” Lukas 1:46-47

2. Creative activity. Pa-photo copy ti activity sheet ket ibunnog kadagiti ubbing, ibaga nga kompletuenda ti ladawan sandanto kulayan.

3. Panagbibinnuray: Kalpasan nga makulayan, dagiti agad-adal ideklarada, “Ni Maria ti imuna a nangisuro ken Jesus.” Maibaga iti tunggal maysa nga inda mangibingay no ania dagiti insursuro ni Maria ken Jesus kasla koma: “Insuro ni Maria ni Jesus nga agkararag. Insuro ni Maria ni Jesus nga agkankanta ti pagdayaw iti Dios.”

2. Creative activity: Kitaen dagiti ubbing dagiti nadumaduma a parte ti ladawan a makita iti activity sheet. Kartibenda dagiti nadumaduma a parte sada ipigket a mangipakita ti Ina ken Anak. Ibagbaga nga arkusanda wenno kulayanda ti inaramidda.

3. Aggigidan dagiti ubbing nga mangibaga, “Agyamanak ti pannagtulongmo kaniak a dumakel nga addaan panagayat iti Dios.”

G. Pangrikep a Panagdayaw

1. Ikabesa dagiti ubbing ti Laglagipen a Bersikulo.

2. Panagdaton: Palagipen dagiti ubbing nga ipaayda ti sagsagutda a siraragsak.

3. Pangrikep a Kanta: “Many, Many Years Ago” and “When Jesus Was a Baby Boy”

4. Pangrikep a Kararag: Apo Dios, agyamankami ti panangipalubosmo nga maamoanmi a ni Jesus ket nagbalin met a kas kadakami - a makasapul ti pannakataripato ken panangidalan ni Maria nga Inana. Agyamankami kadagiti mangisursuro kadakami iti pammati - dagiti nagannakmi, ti Sunday School teachermi, ken ti Pastormi, Daytoy ti kararagmi iti nagan ni Jesus. Amen!

Middle and Older Elementary Levels

I. Panggep

Kalpasan ti panagadal, dagiti nagatendar ket manamnana a:

1. Maibagada a ni Maria ti immuna nga nangisursuro ken Jesus iti panagpammati;
2. Maammoanda ken maappesiarda dagiti immuna nga nangisursuro kadakuada iti nakristianuan a pammati; ken
3. Maipakitada ken maibingayda ti pammati kadagiti kakabsatda, gagayemda ken dagiti kaeskwelaanda.

II. Konsepto: Insursuro ni Maria ni Jesus nga agpammati iti Dios

Dagiti Kasapulan: Biblia, pagkantaaan,

III. Linaon ti Panagadal

A. Panglukat a Panagdayaw

1. Panangpasangbay: Kablaawan dagiti ubbing nga agsasangpet.
2. Isuro ti kanta "Love God" ket uliten dagiti kanta nga kankantaen kada Domingo.
3. Panglukat a Kararag: "Apo, itag-aymi ti naganmo ita a bigat. Agyamankami ti pannakiaddam kadakami. Tulongannakami kas binsabinsaen ti mangisuro kadakami no kasano nga insuro ni Maria ni Jesus nga agpammati. Iti nagan ni Jesus agkararagkami, Amen!

B. Panagsagana

1. Ibaga kadagiti ubbing a manglagipda ti dua nga trabaho iti balay nga kadakuada maragragsakanda un-unay a mangar-aramid ken ti rason no apay nga daytoy ti pinilida. Ibingayda dayta a kapadasan ken ragsak iti kaabayda ti tugaw.
2. Saludsoden dagiti sumaganad:
 - a. Sinno ti nangisuro kenka kadaytoy a trabaho ti balay?
 - b. Mamin-anum nga ar-aramidem daytoy a trabaho ti balay?
 - k. Ania ti mariknam iti kanayon a panangaramidmo daytoy nga trabaho ti balay?
3. Sinno ti ipagarupmo a nangisuro ken Jesus nga aramidenna dagiti trabaho ti balay? Ammuentay man iti istoriatayo ita a bigat.

C. Learning Time

C. Panawen ti Innadal

1. Ibagam: "Maammuantayo iti istoria ita a bigat no sino dagiti kangrunaan a tattao nga agratrabaho iti trabaho iti balay"
Maysa a malem agtugtugaw ni Maria iti salasda, sinaludsod ni Maria ken Jesus, "Inugasam kadi dagitay nanganantayon?"
"Wen, nanang!" insungbat ni Jesus.
"Dagitay ngarud kalapatitayo, pinakan mo kadi idan?" dinamag manen ni Maria.

“Wen nanang, pinakankon idan!” insungbat ni Jesus nga umis-isem.

“Nagsayaaten nakkong. Pudno a natulnog ka nga ubing, Jesus,” dinayaw ti anakna.

Idi kuan, inayaban ni Maria ni Jesus, “Umayka ditoy abayko annakko. Ikabesa ta manen ti naindaklan a bilin a kas inaramidda itay bigat. Agkidemda ngarud.

Ket kinunada,

“Denggem, O Israel, ti Apo ti Diostayo. Maymaysa ti Diostayo.

Naindaklan ti nagan ken Gloria ti Dios ket ti pagarianna agnanayon ken awan patinggana.”

Intuloy ni Jesus nga inkabesa ti naindaklan a bilin kas sursurotena ni nanang a nangisursuro kenkuana.

“Laglagipem annakko, no agkararagtagayo daytoy ti wagas nga makisarsaritatayo iti Dios. Ditay agtagtagari ta dengdenggenatayo ti Dios, kas koma agsasaoak dengdengennak.” Inlawlawag ni Maria.

Kasanguanan a nagkararag da Jesus iti Naindaklan a Bilin, timmakderda, nagnada iti tallo agpasango ken tallo nga agpalikod. Nagtakderda nga nagkararag, nagdawatda ken nagyamanda iti Apo iti adu nga ayat nga inpapaay ti Apo kadakuada.

Nakaragragsak ni Jesus a nangar-aramid dagiti insursuro ni Maria nga inana. Nagkankanatada kadagiti Salmos a pagdaydayaw iti Apo.

Linaglagipna dagiti amin nga insursuro ti inana kenkuana.

Idi kuan agdungsan ni Jesus iti saklot ni Maria. “Maturogkan annakko. Nalpas manen ti maysa nga aldaw.” Inyarsaas ni Maria.

D. Panangpauneg ti Adal/Panagbibinnuray

Ilawlawag ti istoria ket saludsoden dagiti sumaganad.

1. Saludsoden dagiti sumaganad:

a. Sinno nangisuro ni Jesus nga agkararag? (Maria)

b. Ania ti ikabkabesada Jesus ken Maria? (Ti Naindaklan a Bilin)

k. Ania pay dagiti banag nga insursuro ni Maria maipanggep iti Dios?

d. Ania pay dagiti insursuro ni Maria ken Jesus a kararag? (ti Kararag Shemoneh Esrei)

e. Ania ti aramidenda Maria ken Jesus sakbayda nga agkararag? (Tumakderda, magnada tallo agpasango ken tallo agpalikod)

f. Ania ti ar-aramidem no agkararagka? (Agkidem ken pagtakkubem ti dakulapmo)

2. Ipresentar dagiti ladawan nga mangipakpakita no ania ti ar-aramiden ni Jesus. Damagen kadagiti ubbing no ania dayta ken ikomperada kadagiti ar-aramidenda iti agdama. (uppat a ladawan iti activity sheet.

3. Panagbibingay. Saggaysa dagiti ubbing nga mangibingay kadagiti kapanpanunotanda? (Ni Jesus nagbalin met a kas kadatayo, dimngeg ken nagtulnog kadagiti nagannakna)

E. Panangdiskubre ti Adal

Saludsodem: “Sino nangisuro ken Jesus nga agpammati? Sinno nagisuro kenka nga agkararag ken mangayat iti Dios? Ania pay dagiti insursuroda a wagas ti panagayat iti Dios?”

F. Panangyaplikar iti Naadal

1. Isuro kadagiti ubbing ti Laglagipen a Bersikulo: Kinuna ni Maria; “Toy pusok idaydayawna ti Apo, ket agragsak toy kararuak gapu iti Dios a Mangisalakan kaniak. Ta nalagipnak, siak a nanumo nga adipenna, ket manipud ita, awagandakto a nagasat dagiti amin a tattao.

2. Gudwaen ti grupo. Diskutirenda no ania a parte ti leksion ti magusgustuanda unay. Ibagay nga idramada ti sungbatda iti klase.

3. Creative activity. Agaramid dagiti ubbing ti card a pagnagyaman. about the Christian faith.

Para ME. Agaramid dagiti ubbing ti card a panagyaman kadagiti tattao nga mangisursuro kadakuada nga agpammati.

Para OE: Agaramid dagiti ubbing ti card a pagyaman kadagiti tattao iti pagadalan ken simbaan isu a nangisursuro kadakuada nga agpammati.

G. Pangrikep nga Aramid

1. Ibaga kadagiti ubbing nga ikabesada ti laglagipen a bersikulo.
2. Panangpasingked ti naadal: Kaslaak ken Jesus idi ubing. Dagiti nagannak kaniak ti nangisuro kaniak nga agpammati. Agyamanak kadakuada ti panangisuroda kaniak.
3. Panagdaton
4. Pangrikep a Kanta: "What Child Is This" (Hymnal of a Faith Journey # 138)
5. Pangrikep a Kararag: Apo Dios agyamanak kadagiti tattao a nangisuro kaniak nga agpammati. Iti nagan ni Jesus nga annakmo. Amen!

Youth Level

I. Panggep

Kalpasan ti panagadal, dagiti nagatendar ket manamnama a:

1. mailadawanda ti pagtaktakderanda Hannah ken Maria maipapan iti lubong babaen iti kantada;
2. maammoanda ti importansia ti inaramid ni Maria kas immuna a nangisuro ken Jesus nga agpammati;
3. maamoan ken maappresiarda dagiti mangisursuro iti kapilia maipapan iti Nakristianuan a pammati ken;
4. makaaramid ti kari a tumulong ken makipagpartisipar iti ministerio ti panangisuro ti kapilia

II. Konsepto: Ni Jesus ket ingamerna iti kinataona **ti ugali ken pannirigan ni Inana iti lubong.**

Dagiti Kasapulan: Biblia, himno,

III. Linaon/Wagas ti Panagadal

A. Panglukat a panagdaydayaw

1. Panangbasangbay/Panagsasangpet.
2. Panglukat a Kanta: umuna a dua nga paraupo ti "What Child Is This" (Hymnal of a Faith Journey #138)
3. Panglukat a Kararag: Apo Dios, idaydayawmi ti Nasantuan a Naganmo. Ipakaawatmo kadakami ti kararag ken kanta ni Hannah ken Maria. Agkararagkami iti nagan ni Jesus. Amen!

B. Panagsagana

1. Agay-ayam dagiti agtutubo iti "Sapulem ti Sapatosmo". Amin dagiti agad-adal ikabilda ti sapatosda iti tengga. Saggaysaen met ida nga abbongan ti matada ket birukenda ti sapatosna. Ti panangbirok iti sapatos, ipukkaw ti klase ti aramidenna tapno masapulanna ti sapatosna.
2. Saludsoden dagiti sumaganad:
 - a. Kasanom a nabirukan ti sapatosmo?
 - b. Ania dakkal nga adalyo iti inay-ayamyoy? Apay?
3. Sawem: "Ti dumngeg ti patigmaanan ket importante la unay tapno ammom ti aramidem ken nasayaat ti bunga ti aniaman nga aramidem. Kasanguanan nga inrugi ni Jesus ti ministeriona, kas maysa nga ubing dinengdenegna ni Maria nga Inana. Ni Maria ti nagbalin nga mestrana iti kinaubingna. Kaaduan a dagiti nagannak ti umuna a mangisuro kadagiti annakda. Saan laeng nga kinasayaat a galad ken ugali ti isursuroda no di ket iyam-ammoda ni Jesus kadatayo ken itugotdatayo a mapan iti uneg ti kapilia.

C. Panawen ti Panagadal

1. Sawem: "Basaentayo ti kanta dagitoy dua a Nanang ket maamuantayo no kasano nga inakseptarda ti akemda nga mangpatanur ti annakda. Madamdama, diskutirentayo no ania ti pannairiganda iti lubong."
2. Grupoen ti klase ti dua. Naganan ti maysa nga grupo ti Hanna ken Maria ti maikadua a grupo. Ited kadakuada ti activity sheet.
Grupo ni Hannah. Ti umuna a grupo basaenda ti kanta ni Hanna iti 2 Samuel 2:1-8. Kalpasan a mabasada ti Biblia, mangkita ti sabali a bersyon ti Biblia, sakarenda sadanto ikompera...
Grupo ni Maria: Basaen ti maikadua a grupo ti kanta ni Maria iti Lukas 1:46-55. Kalpasan ti pannakabasa, isuratda iti bukodda nga pannakaawat.

D. Panangpauneg ti Adal/Panagbibinuray

Saludsoden dagiti sumaganad:

1. Ania ti pannirigan ni Hanna maipanggep iti lubong? (kitaen iti pannakailawlawag ti teksto ken tarabay)
2. Ania ti pannirigan ni Maria maipanggep iti lubong? (kitaen iti pannakailawlawag ti teksto ken tarabay)
3. Ania ti pagpadaan dagitoy a kanta maipapan iti Dios? (Kitaen iti pannakailawlawag ti teksto ken tarabay)
4. Ammo ni Maria a naindaklan ti Dios, ania ti panagkunam a wagas ti panangisurona ken Jesus tapno maaddaan iti panagpammati iti Dios?
5. Iti agdama a panagbiagtayo, kasano nga nasursurotayo ti agpammati?

E. Panangdiskubre ti Adal

Saludsodem: “Kadagupan amin nga nangisursuro kenka nga agpammati, sino kadakuada ti appresiarem la unay? Apay?”

F. Panangyaplikar ti Adal

Ilawlawag dagiti sumaganad a bersikulo:

1. Inkararag ni Hanna: “Pinnuno ti Apo toy pusok ti rag-o; gapu iti inaramidna, anian a ragsakko. Katawaak dagiti kabusorko; wen, maragsakannak ta tinulonganak ti Dios! (I Samuel 2:1)
2. Kinuna ni Maria; “Toy pusok idaydayawna ti Apo, ket agragsak toy kararuak gapu iti Dios a Mangisalakan kaniak. Ta nalagipnak, siak a nanumo nga adipenna, ket manipud ita, awagandakto a nagasat dagiti amin a tattao. (Lukas 1:46-48)
3. Mangaramid iti tunggal maysa ti resolusion wenno sapata no kasano nga mainspiraran dagiti dadduma a tumulong iti ministerio ti panangisuro iti Iglesia.

G. Pangrikep a Panagdayaw

1. Panagidaton
2. Pangrikep a kanta: maudi a dua a paraupo “What Child Is This” (Hymnal of a Faith Journey # 138)
3. *Pangrikep a Kararag: Apo Dios. Agyamankami iti gundawaymi a mangammo no kasano a da Hanna ken Maria nakitada ti kinaindaklan mo ditoy lubong. Iti nagan ni Jesus, agkararagkami ... Amen.*

Adult Level

I. Panggep

Kalpasan daytoy a panagadal, dagiti nagadal manamnama a:

1. maibagada ti pinakaimportante a paset ti pammati da Hanna ken Maria kas nailanad iti kanta;
2. mapaggidiatda ti pagtaktakderanda Hanna ken Maria maipanggep iti lubong;
3. madeskribirda no ania dagiti naawatan unay ni Jesus manipud kadagiti panursuro ti inana;
4. makailistada kadagiti panrsuro ti nakristianuan a pammati a mairelasyon iti panagdur-as dagiti kababalin isu nga ipakita ti kanta da Hanna ken Maria;
5. mailiniada ti pammatida kadagiti Nakristianuan a panursuro.

II. Konsepto: Ni Jesus ket ingamerna iti kinataona ti ugali ken pannirigan ni Inana iti lubong.

Dagiti Kasapulan: Biblia, himno, lapis

III. Linaon Ti Panagadal

A. Panglukat a Panagdayaw

1. Panangbasangbay/panagsasangpet.
2. Panglukat a Kanta.
3. Panglukat a Kararag: Apo Dios, idaydayawmi ti Nasantuan a Naganmo. Ipakaawatmom kadi kadakami ti kaipapanan ti kararag ken kanta ni Hannah ken Maria. Agkararagkami iti nagan ni Jesus. Amen!

B. Panagsagana

1. Pugtuan wenno patangan dagiti agad-adal no sinno kadagiti tattao iti Biblia ti agkankanta. Iparisda ti Nagan iti kanta a kinantada babaen iti panangsilpo ti kulom A ken kolum B. (Mabalin mo met nga aramiden nga ay-ayam)

Kolum A	Kulom B
1. Moses (b)	a. Inkantana ti anunsiyo a pannakayanak ti Mesias.
2. David (d)	b. Inkantana ti panagdayawna iti Dios gapu iti panangisalakan ti Dios kadagiti Israelita manipud kadagiti kabusor.
3. Miriam (c)	c. indalanna dagiti tattao nga agkanta ken agsala gapu ta naimatanganda ti wayawaya dagiti tattao.
4. Angels (a)	d. Inkantana ti dayaw ken kinaindaklan ti Dios

2. Saludsodem: "Ania ti panagkunam apay nga dagiti dadduma tattao iti Nasantuan a Surat ket iyebkasda tu mensaheda babaen iti panagkanta?"

3. Sawem: "Ita kitaentay man dagiti dua a kanta a kinanda dagiti dua a Nanang. Ania ngata dagiti mensaheda maipanggep iti panagpammati?"

C. Panawen ti Panagadal

1. Gudwaen ti klase. Naganan ti umuna a grupo ti Hanna ken ti maikadua Maria. Ikkan ida ti activity sheet.

2. Ti grupo ti Hanna ipabasa ti “Kanta ni Hanna” iti I Samuel 2:1-8. Kalpasan ti panangbasada iti bersikulo, sungbatanda dagiti sumaganad a salsaludsod:

a. Kasano ti panangiladawanmo ti pammati ni Hanna kas naipannayag iti kanta? (Dinaydayaw ni Maria ti Dios gapu iti kinaindaklanna) Kasano ti panangyebkasna ti panagdayawna iti Apo?

b. Ana a bersikulo ti mangibagbaga ti panniriganna ni Hanna iti lubong. Vv.2-10: Nasantuan ti Dios, ammona amin, kangatuan, naayat, naasi ken managparabur)

3. Ibaga iti Grupo ni Maria a basaenda ti Kanta ni Maria iti Lucas 1:46-55. Kalpasan ti panangbasada, sungbatan dagiti sumaganad:

a. Kasano nga naipannayag ti pammati ni Maria iti kantana? (vv. 46-48: nakita ti Dios ti kinanumo no Maria) Kasano ti panagdayawda iti Apo?

b. Ania dagiti pagtaktakderan ni Maria maipapan iti Lubong? (vv.49-55: Nasantuan ti Dios, manangngaasi, naindaklan, kangatuan ken mapagtalkan)

4.. Ikkan ida ti tallo a minutos nga mangibingay no ania dagiti sungbatda manipud kadagiti salsaludsod iti ngato.

D. Panangpauneg ti Adal/Panagbibinnuray

1. Ilawlawag ti pakasaritaan ti konteksto dagiti kanta iti pannagpauneg ti leksion. Kitaen ti pannakailawlawag ti teksto ken tarabay kadagiti mangisursuro.

2. Saludsoden dagiti sumaganad:

a. Ikompera ti pannirigan ni Hanna ken Maria maipanggep iti lubong. Agdumada kadi wenno agpadada? Kasano ti panagdumada? Kasano ti panagpadada?

b. Iti kinaubing ni Jesus, inladawan ti kanta ti akem ni Maria. Basaen ti Lukas 4:18-19.

k. Iladawan no ania dagiti panursuro ni Maria a naigamer iti biag ni Jesus.

E. Panangdiskubre ti Adal

Saludsodem: Kasano nga impapuso ni Jesus ti pannirigan ni Maria maipapan ti lubong? Ania dagiti dadduma a panursuro ti nakristianuan a pammati a mairelasyon iti panagrang-ay dagiti kagagalad kas naipannayag iti Kanta ni Anna ken Maria?

F. Pannagyaplikar ti Adal

Iyebkas ti pannakimaymaysa iti daytoy nga kinapudno: Saan laeng nga inyanak ni Maria ti Messias no di ket di pinatanurna, indalanna, ket insurona tapno maipatungpal ti ministerio ni Jesus ditoy rabaw ti daga.

G. Pangrikep a Panagdayaw

1. Panagdaton

2. Pangrikep a kanta: last two stanzas of the song “What Child Is This” (Hymnal of a Faith Journey # 138)

3. Pangrikep a Kararag: Apo Dios, agyamankami ti panangipalubosmo kadakami tapno maammuanmi no kasano nga pinatanur ni Maria ni Jesus, tapno maisagana ti biagna para iti ministerio ti panangisalakanna iti lubong. Idalannakami nga mangawat no kasano nga inpangpangruna ni Jesus ti ministeriona ken no ania met ti panggepna iti biagmi. Iti nagan ni Jesus dawatenmi amin dagitoy, Amen!